


महापुजा

छपल



काय मण्डल

ने.सं. ११२२ न्हूदँया लसताय्

म्हपुजा छपुलु

च्वमि

दि. पं. रत्नकाजी वज्राचार्य व
बि. एस. रत्न

Sarbagya Ratna Bijracharya
Choybun, Dhimslohan, Kun
Phone:-276773



पिकाक

नेपालभाषा मित्रा खलः

जमः, येँ ।

पिकाक - नेपालभाषा मिसा खलः, यै ।

सौजन्य - हीरा-चिनी पुं द्रष्ट

बुद्ध संवत् - २५४४

नेपाल संवत् - १९२२

विक्रम संवत् - २०५८

ईस्वी संवत् - २००१

पिदंगु न्हि - १९२२ क्यंगुया लसताय्

ब्याक्क अधिकार पिकाकयाके

पुफ स्वःम्ह - मय्जु सरला वज्राचार्य

मू - भित्तका जक ।

थाकू -

हिसि अफसेट प्रिन्टर्स

जमः (सेतोदरबार), यै ।

फोन ल्याः २२६४१६

पिकाक:पारखें

नेपालभाषा व थ्वया साहित्य, कला, संस्कृतिया स्थापित प्रतिष्ठायात संरक्षित याना: दे न्यंक चिच्चा दनाच्चंगु नेवा: मिसा प्रतिभा, ऊर्जा व सङ्कल्पयात जागृत यायेगु व नेवा: मिसापिन्त परिचालन याना: नेपालभाषा साहित्य, कला, संस्कृतिया अध्ययन, अनुसन्धान व प्रकाशन यायेगु तातुना: ने.सं. ११०९ गुंलागा ७ कुन्हु नेपालभाषा मिसा खल:या स्थापना जूगु ख: । थ्वहे इवल्य् नेपालभाषा मिसा खलकं थीथी विधाया सफूत पिथना वयाच्चनागु दु । थुगुसी तिनि खल:या फिनिदँ बुदिया लसताय् न्याम्ह मिसा च्वमिपिनिगु कृति व छगू सम्पादित नापं याना: खुगू सफू पिथनागु दुसा थुगुसिइ हे नेपाल संवत् ११२२ न्हूदँया लसताय् दि.पं. रत्नकाजि वज्राचार्य व वसपोलया काय् सर्वज्ञरत्न वज्राचार्यया “म्हपुजा छपुलु” नांगु सफू पिथने दया: साब लय्ता: ।

थुगु सफू पिथनेत ग्वाहालि यानादीपिं बौद्ध विद्वान् च्वमिपिं, सफूया प्रूफ स्वयादीम्ह, देब: च्वयादीम्ह व आर्थिक ग्वाहालि यानादीपिं सकसितं आपालं सुभाय् देछानाच्चना । थुकथं हे सकसिगुं निरन्तर ह:पा: व ग्वाहालि दइगु खँय् क्वातुगु भलसा कयाच्चना ।

सर्गतय् लुइगु लाय्‌लामाया लाउन थें विविधताय् एकता दुगु नेवा: संस्कृतिया लाउनय् नेपाल संवत् राष्ट्रिय गौरव ख: धका: नालेगु बल बुया वयेमा धका: कामना यासैं न्हूदँ नेपाल संवत् ११२२ क्यंगु लसताय् दुनुगलनिसें भिंतुना देछानाच्चना । सुभाय् ।



नेपालभाषा मिसा खल:

जम, यें ।

स्वन्हुतिथि – स्वन्ति

– बि. एस. रत्न

सु-संस्कृतिं छायेपियातःगु सकल नेपाःमिपिनि मंकाःगु नखःमध्ये महत्त्वं जाःगु नखः स्वन्ति-स्वन्हुति खः । थुयात यमपञ्चक, गोवर्द्धन पुजा, तिहार आदि नां बियातःसां तबि नं भी नेपाःमिपिनि निन्तिं स्वन्ति म्हपुजा हे खः । भीसं थुगु नखः थःगु हे पहःनं हनावयाच्चना । थुकिइ प्राचीन नेवाः सभ्यताया आभास थ्व नखः नं ब्यू ला धया थें च्वं ।

न्हापां लक्ष्मीपुजा धकाः भीसं थःगु छें छखां मतच्याकाः भःभः धायेकाः बहनी थःथःगु छेंय् धुकुतिइ लक्ष्मीद्यः स्वनाः आपालं परिकार तयाः श्रद्धापूर्वक पुजाभाव याइ । थ्वयात हे लक्ष्मीपुजा धाइ । खास यानाः लक्ष्मीया अर्थ खः सम्पत्ति । भीसं न्यना नं वयाच्चनागु दु कि भी मान्यजनपिसं आशीर्वाद बिइबलय् श्रीबृद्धि जुयेमा धकाः धाइ । थ्व धापू नं लक्ष्मीया अर्थ धन सम्पत्ति हे खनेदु, तर धन सम्पत्ति धायेव ध्यबा जक मखु वा, छ्व आदि अन्नयात नं कयावयाच्चंगु दु थ्व सकस्यां स्यूगु हे खँ जुल ।

अन्न हे आर्थिक स्रोतया साधन खः । भीसं थन कार्तिकतकया दुने सकसियां वा लये सिधयेकाः वा फुक्क धुकुतिइ स्वथनाः दच्छितकया मेहनत सफल जुल भाःपाः छगू किसिमया आम्दानी खर्चया ल्याःचाः यायेगु वा आर्थिक वर्षया अन्तिम न्हि धाःसां छुं मपाः थें च्वं । छाया कि कन्हय्कुन्हु ला न्हूगु

दँ (वर्ष) शुरु जुइगु जुल । उकिं हे उगु दँया ल्याःचाः क्वचायेकाः लसतां धुकूपुजा (लक्ष्मीपुजा) हनावयाच्चनागु ला धया थें ताः ।

तत्कालीन समाजय् न्ह्यागु ज्याखँय् अध्यात्मिक रंगं इलाः न्ह्याकायंकीगु खँ पुलां बाखं, वंशावली आदिं कनावयाच्चनागु नं दु । अले भीगु संस्कृति अध्यात्मिक ला व लुसि थें प्यपुनाच्चंगु भी सकस्यां स्यूगु हे खँ खः ।

ध्वहे परम्पराय् दुने भीसं लक्ष्मी स्वरूप विभिन्न देवीपिं पुज्याना वयाच्चनागु दु । विभिन्न व्यवसाय ज्या यानावयाच्चपिं छःछःपिनिगु उपासना आदि पुजाभाव यानावयाच्चंगु दु । गुम्हेस्यां वसुन्धरा छःयात लक्ष्मी स्वरूप मानय् यानावःसा गुम्हेस्यां अन्नपूर्णदेवीयात पुजा याइ । थथे आपाःस्यां श्री विष्णुया अर्धाङ्गिनी लक्ष्मीयात मानय् यानाः पुजा याइसा गुम्हगुम्हेस्यां यक्षनीतय्त धनया प्रतीक लक्ष्मी मानय् यानाः पुजा याइ । थुगु प्रकारं लक्ष्मीया विभिन्न रूप भीगु न्ह्यःने दु मधासे मगाः ।

न्हापां ल्यू म्हपुजा थुकुन्हुया दिनय् नेपाल संवत् न्हूदँ क्यनीगु न्हि खः । थुकुन्हुयात अंगपुजा म्हपुजा नं धाइ । थुकुन्हु दाजु किजा तःकेहँ सकलें मुनाः म्हतिं म्हतिं मन्दः च्वयाः थी थी तःजिया सिसाबुसा (फलफूल) आदि न्ह्यःने तयाः मत च्याकाः भःभः धायेकः हनावयाच्चना ।

थुकुन्हु च्वयेगु मन्दः च्याहः पले दुगु मन्दः पोतासं च्वयाः थुकिइ दुने आखें, वा, माय्, म्वाः व ताय् आदि अन्नं चाःहिकाः उकिइ दुने चिकं मन्दः धकाः चाकलाक थानाः चाः छ्वाः दयेकी । थुकथं मन्दः थानाः च्वयाः पुजा यायेगु स्वयेबलय् भीपिं सकलें संघया शरणय् वनागु प्रतीक जू वः । छाय् कि च्याहः पले दुगु उगु मन्दलय् अष्टमङ्गल च्वनी । छहः छहः पतिकं अष्टमङ्गलया छगू छगू चिन्ह च्वनी, उगु चिन्ह अष्टबोधिसत्त्वपिनिगु प्रतीक खनेदः वः । वहे अष्टबोधिसत्त्व दत्थुइ बिज्याःम्ह अवलोकितेश्वर करणामय खः ।

स्वयम्भू पुराण, सुखावति ब्यूह, अष्टमङ्गलगाथा आदि ग्रन्थय् अष्टमङ्गलया बाखं महिमात वर्णित यानातःगु यक्व दु । गथे कि- अष्टमङ्गलया

पुजा यायेगु, अष्टमङ्गल दयेकाः विभिन्न द्यःद्यःपिन्त द्यछात धाःसा उकिया पुण्य अपार दुगु व शान्ति स्वस्ति आदि सर्वत्र मङ्गल जुइगु, कल्याण जुइगु थुलि जक मखु बुद्ध, बोधिसत्व, लोकेश्वर आदिपिन्त पुजा यायेबल्य् वसपोलपिनिगु अङ्ग प्रत्यङ्ग्य् दोहलपा पुजाभाव यातसा उकिया पुण्य अल्याख व अर्थात् बुद्ध हे जुइ फइगु खँ नं न्ह्यथनातःगु दु ।

बौद्ध पक्ष्य् अष्टबोधिसत्व धयावयाच्चंगुयात हिन्दू पक्ष्य् महाद्यः शिवलिङ्गया रूप अष्टविताराग नाम न्यनाच्चंगु दु । थ्व भीगु धार्मिक सहिष्णुताया दसु खः ।

थन अष्टबोधिसत्व वितराग व अष्टमङ्गलया प्रतीकात्मक थुकथं खनेदु—

१. मैत्रीय बोधिसत्व	मणिलिङ्गेश्वर वितराग	श्रीवत्स
२. गगनगंजबोधिसत्व	गोकर्णेश्वर वितराग	पुण्डरीक
३. समन्तभद्र बोधिसत्व	किलेश्वर वितराग	ध्वज
४. वज्रपाणी बोधिसत्व	कुम्भेश्वर वितराग	कलश
५. मञ्जुघोष बोधिसत्व	गर्तेश्वर वितराग	चामर
६. सर्वनिवर्ण विस्कम्मी बोधिसत्व	फणिकेश्वर वितराग	मत्स्य
७. क्षितिगर्भ बोधिसत्व	गन्धेश्वर वितराग	छत्र
८. खगर्भ बोधिसत्व	विक्रमेश्वर वितराग	शंख

थुलि जक मखु अष्टमङ्गल छता देछाया पुजा यातसा भीगु ग्रह, दशा आदि नं शान्त जुइगु अर्थात् अष्टमङ्गल छानाया पुण्यद्वारा ग्रह, दशा, भय आदि नं फायावनीगु खँ नं उगु ग्रन्थ्य् वर्णित यानातःगु दु । गथे कि— श्रीवत्स दोहलपिल धाःसा सूर्य दशा शान्त जुइ । पुण्डरीक दोहलपिल धाःसा चन्द्र दशा फायावनी । ध्वज छात धाःसा मङ्गल दशा शान्त जुइ । अथे हे च्चाम्बः छात धाःसा बृहस्पति ग्रहया दशा फायावनी । मत्स्ययुग्म छात धाःसा शुक्र ग्रहया दशा शान्त जुइ । छत्र चढे यात धाःसा शनिश्चरया दशा शान्त जुइ । शंख चढे यात धाःसा राहु दशा, केतु आदिया दशा फायावनी धइगु न्ह्यइपुगु खँ नं मदुगु मखु ।

थधिंजाःगु विशेषतां जायाः हे भीथाय् अष्टमङ्गलयात थी थीकथं पुजा, क्रिया आदि धार्मिक ज्याखँय् वा सामाजिक ज्याखँय् व सुयागुं स्वागत सत्कारया लागि भीसं छ्यलावयाच्चना । थी थीकथंया पुजा मध्ये स्वन्हुति, म्हपुजाबल्य् विशेषकथं उकिया हे मन्दः च्वयाः पुजा यानाः अर्थात् धलं दनावयाच्चना । थुकिइ शान्ति स्वस्ति आदि दच्छितकया ग्रह दशा आदि छुं मदयेमा धकाः भावना यानाः संघया शरण्य् वनाः संघ मण्डल दनाः धौसगं गोसगं कयाः बखत सिजनकथंया सिसाबुसा (फलफूल) लःल्हानाः मङ्गल कामना यानाः मुखसुद्धि ग्वाःग्वय् नयाः भःभः धायेक भीसं हनावयाच्चना ।

भीसं अष्टमीव्रत, वसुन्धराव्रत आदि धलं दनेबल्य् नं न्हापां बुद्ध मण्डल, धर्म मण्डलया नापनापं संघ मण्डल नं दनावयाच्चनागु दु, उक्त संघ मण्डल्य् थुकथं बोधिसत्त्वपिं खनेदु—

अवलोकितेश्वर (करुणामय) —	दत्थुइ
मैत्रीय बोधिसत्त्व —	न्ह्यःने
गगन गञ्ज —	भीगु देपाय्
समन्तभद्र —	च्वय् फुसय्
वज्रपाणी —	भीगु जवय्
मञ्जुघोष —	देपा क्वथुकुं (अग्नी)
सर्वनिवर्ण विस्कम्मी —	देपा थथुकुं (नैऋत्य)
क्षितीगर्भ —	जव थथुकुं (वायुव्य)
खगर्भ —	जव क्वथुकुं (इसान)

ध्व वसपोलपिनिगु ध्यानवर्ण साधन मालाय् वर्णन यानातःगु दु ।

थुकथं च्याहः पले मन्दः च्वयाः उकी दुने ताय्, म्वाः, माय्, वा व आखें आदि अन्नं चाःहिकी । उगु अन्न बिइम्ह वसपोल करुणामय खः । वाया दुने जाकि मदुबल्य् कामारु कामाक्षं थौकन्हय् आछामनिसें करुणामययात थन

बिज्याका: वाया दुने जाकि दयेकूगु बाखं न्यना हे वयाच्चनागु दु । थथे हे वसपोल दनाच्चनाबिज्या:गु नं गुथायूतक प्राणीपिं कल्याण जुइमखु, निर्वाण प्राप्त जुइमखु अर्थात् गुथायूतक प्राणीपिं निर्माण प्राप्त जुइमखु उथायूतक जि नं फ्यतुइ मखु धका: दनाबिज्या:गु खँ भी बुढापाकातय्सं कनावयाच्चंगु दु । थुगु खँया आधार महायानया बोधिसत्व चर्याया आदर्श नं थथे हे खनेद: व: । उकिं हे वसपोलपिनिगु न्ह्य:ने च्वना: स्यांगुलि थें चंचंधाया: (नासलं लिना:), खोसिं थें धिसिमिसि धाया: विर्यपराक्रम दयेमा धका: थ:त थमं पुजा याना: अर्थात् म्हपुजा यानावयाच्चना धा:सां छुं मपा: थें च्वं ।

गुम्ह गुम्हेस्यां थुगु म्हपुजायात आत्मपुजा धका: नं धा: । उगु आत्मपुजा व ब्रम्हपुजाया स्वरूप ला: व: छाया कि वैदिक साहित्यय् आत्म व ब्रम्ह छगू हे ख: धका: नं धयात:गु दु हैं । अथे जुया: म्हपुजा यायेगु परम्परा नेपा:गालय् वैदिककालनिसें दुगु खयेफु धका: नं धयाजूपिं दु । तर थन बिचा:याये बह:जू कि गैर नेवा:पिनि म्हपुजा यायेमा:गु मदु । वैदिक साहित्यकथं जूसा अनपिसं छाया मयात ? थथे वैदिक साहित्यय् दुगु ख:सा वैदिक साहित्यया प्रवर्तकपिसं नं म्हपुजा याना: उदाहरणया रूपय् क्यनाबिइमा:गु दु । थ्व विषय विचारणीय नं जूव: ।

थुकुन्हुया हे दिनय् नेपाल संवत् उदय जूगु । थ्व संवत् उदय जूबलय् गुगु संवत्या नां पशुपति भत्तारक संवत्सर, स्वस्ति संवत्सर, शुभ संवत्सर, नेपाल संवत्सर, नेपाली संवत्सर आदि पुलां पुलांगु सफू च्वयात:पिसं छ्चलाव:गु खँ जुल । थुलि जक मखु स्वयम्भू संवत् धका: नं ८४१ सालय् अश्वघोष नन्दीमुख अभदानय् उल्लेख यानात:गु दु । थथे हे नेपाल संवत्सरयात गुम्ह गुम्ह गैर नेवा:तय्सं नेवारी संवत्सर धका: साम्प्रदायिकता दुत छ्वयेगु कुत: मयागु मखु ।

लियांल्यू किजापुजा, थ्व नख: भी नेवा:तय्सं जक हनीगु मखु । गैर नेवा:पिसं नं उलि हे श्रद्धापूर्वक हनावयाच्चंगु दु । धायेबलय् किजापुजा धा:सां दाजुयात नं पुजा यानावयाच्चंगु दु । थ्व विषय थ: तता केहेंपिसं थ: दाजु

किजापिनिगु आयु आरोग्यया कामना यानाः पुजा याइ अगाढ माया दयाया भावनां सासाः भिंभिंगु मरिचरि, फलफुल आदि चिजबिज तयाः नकी । थुबलय् थःथः दाजु किजापिन्त धौसगं गोसगं आदि बियाः स्यांगुलि थें चंचं धायेमाः, खोसिं थें धिसिमिसि धायेमा, ग्वय्स्वां थें सुखू मगनेमा आदि कामना यानाः ताःआयु व स्वस्थताया कामना यायेगु परम्परा दु ।

बिचाः यायेबलय् उगु ताकय् दच्छिया ल्याःचाः सिधयेकाः थःत थम्हं शुद्ध यानाः अर्थात् म्हपुजा यानाः, थः ततापिं थः केहेपिं म्हं फुला मफुला, अमि दच्छिया ल्याःचाः छु गथे जुल आदि सुख दुःखया खँ ब्याकेत भातृस्नेहनं बिलिबिलि जायेकाः सहयोगया भावनाया प्वः ज्वनाः थः ततापिन्थाय् थः केहेपिन्थाय् दुस्वः वन जुइ । उखे ततापिनि केहेपिनि थः दाजु थः किजा आपुलुखं वःगु खनाः लय्तायाः स्वागत सत्कार याइगु ला स्वाभाविक हे जुल । अले संघ मण्डलया प्रसाद स्वरूप बियाः दुःख सुखया खँ ल्हानाः सहयोगया आदान प्रदान यानाः ततापिनिगु केहेपिनिगु आपालं सुवाः फयाः थःथःगु छँय् लिहां वन जुइमाः । थुगु हे परम्परा लिपा वयाः किजापुजा, दाजुपुजा, भातृपुजा आदि नां नं बियावन ।

कोपुजा, खिचापुजा नं भीसं यायेगु यानावःसां विशेषकथं जुइगु पुजा लक्ष्मीपुजा, म्हपुजा व किजापुजा हे खः । उकिं उगु ताकया जनपिनिगु म्हुतुं स्वन्हुति-स्वन्ति जूवःगु थें जिं ताया । उगु पुजाया आदर्श बांमलाःगु ला मखु थथे हे लक्ष्मीपुजाकुन्हु सुथय् सायात पुजा यायेगु, नागपञ्चमीबलय् नागयात पुजा यायेगु, गुंपुन्हीबलय् ब्याँजा नकेगु धकाः थनया ज्यापुतय्सं बुँइ ब्याँचित जा नकःवनेगु, होलिपुन्हीबलय् गुरुमापायात जा तः वनेगु आदि परम्परा भीगु संस्कृतिइ आपालं दु । अस्तु ।

सितु निलापौ,

ल्याः (६९-७०) चिल्ला-कौलास पिदंगु



म्हपुजा छपुलु

— रत्नकाजी वज्राचार्य

चवय्बुं धिमेल्बहं, स्वयम्भू, यें ।

म्हपुजा भीगु सु-संस्कृति गुलि महत्त्वं भय्भय् ब्यू, उलि हे अर्थपूर्ण नं जू । थ्व थःत थम्हं हे पुजा यानाः हनेगु नखः खः । भीगु परम्पराय् न्हूदँ हनेया इवलय् सुख समृद्धिया कामनाया नापभापं मैत्रीभावं युक्त जुयाः करुणा भावं बिलिबिलि जायेकाः मुद्धिता भावं लयलयातायाः समता (उपेक्षा) भावं स्वयाः प्रज्ञाया अभिवृद्धिं यानाः सकसितं भिन्तुसैं हनीगु खः । थःगु हे शरीर मन स्वरूपया मण्डः (काय मण्डल) स्थापना यानाः बोधिसत्वपिनिगु गुणयात लुमंकाः अनपिं थें हे जि नं जुयेफयेमा धइगु मनंतुनाः हनेगु म्हपुजा खः ।

म्हपुजा नेवाः सकसियां नखः खः । थुजाःगु नखः, थःत थम्हं पुजा यानाः हनेगु नखः शायद संसारय् गनं दइमखु थें च्वं । न्हूदँ ला सकसिनं हनावयाच्चंगु दु । भिन्तुना देछायावयाच्चंगु दु । सुख समृद्धिया कामना नं यानावयाच्चंगु दु तर थःत थम्हं शुद्ध यानाः न्ह्यज्यायेगु परम्परा सुयां खनेमदु । थ्व प्राचीन सभ्यताया महत्त्वय् भीगु लागि गुलि समृद्धशाली, विवेकपूर्ण, गुलि प्रज्ञावान धइगु नं छगू नमुनाया रूपय् म्हपुजां बियावयाच्चंगु धिसिमिसि धाःगु दसु खः ।

थुजाःगु गौरवमय परम्पराया नखः हनेगु इवलय् छन्हू न्ह्यः छैं छखां
 बैथिलाः सुचुकुचु यानाः, इयाः लुखा आदि थाय् स्वांमां तयाः थःपिं नं पूर्णरूपं
 निसि यानाः बहनी छैं छखां मत बियाः थःथःगु धुकू (लक्ष्मी) पुजा यानाचवनी ।
 कन्हय्कुन्हु नं थःथःम्हं शुद्ध जुयाः छैं छखां मत बियाः भःभः धायेकाः काय
 मण्डलया स्थापना अर्थात् पोतासं मन्दः च्वयाः उकिइ न्याता बीब आदिं
 चाःहिइकाः, चिकं मन्दः नं थानाः सुकुन्दा दिनदिन च्याकाः तःता प्रकारया
 सिसाबुसा (फलफूल) न्ह्यःने ब्वयाः, जवय्लाक्क पुजाभः तयाः धुकमुक धायेक
 मुलपतिं थ्यानाः मन्दःया न्ह्यःनेलाक्क फ्यतुइ । थुलि धुनेवं मन्दःयात पुजा
 यानाः सुकुन्दा, सि आदि नं पुजा यानाः थःत नं पुजा यानाः, कोखा-जजंकां
 क्वखायाः, खेलुइताः च्याकाः, सिसाबुसा लःल्हानाः कायेधुनेवं धौसगं ख्यैय्सगं
 कयाः थुगु भावना याइ- (वाक्य)

आदौ कल्याणं मध्येऽव शान्तकल्याणं
 स्वर्थम् सुव्यञ्जनम् केवलं परिपूर्णं परिशुद्धं
 पर्यवदानं ब्रह्मचर्यं संप्रकाशयतिस्म ॥
 आयुवृद्धि यशोवृद्धि वृद्धि विद्या
 सुखाश्चैव जनधनसन्तान सप्तवृद्धिरस्तु ॥

भावार्थ-

आदि, मध्ये, अन्ततकं कल्याण जुयाः व्यञ्जनं परिपूर्णं जुयाः
 ब्रह्मचर्ययात पिब्वयाः धर्म विपरितगु, मखुगु लैपुइ मलायेमा धकाः सुख समृद्धि
 मङ्गलया कामना यानाः हानं जसवृद्धि, ज्ञानवृद्धि, सुखवृद्धि, धनवृद्धि सन्तानवृद्धि,
 ताःआयु व रोग ब्याधि व विभिन्न ग्रह दशा आदि नं मुक्त जुयेमा धइगु भावनां
 बिलिबिलि जायेकाः चित्तया विकार फुककं फुनावंगु भाःपा लय्लय्तायाः भोजन
 यानाः मुख सुद्धि कयाः म्हपुजा क्वचाइ ।

म्हपुजा यायेत च्वयेगु मन्दःयात संघ मण्डल वा काय मण्डल धकाः
 नं धयावयाच्वंगु दु । गुगु थन प्रशंगवश न्ह्यब्वइचवना ।

थुगु मन्दः दत्थुइ चाकः दयाः अनपिने च्याहःपले चाःहुयेका ताय्, म्वाः (हाकुमुस्या), माय्, वा, व आखेंया नापनापं चिकं मन्दः नं थानाः, च्वयेगु मन्दः खः । गुम्ह गुम्हेस्यां ताय्, म्वाः, माय्, वा मतसे गुता बीब नं च्याहःपले पिने चाःहिकेगु नं याःपिं दु । थुगु मन्दःयात श्रीयन्त्रया स्वरूप धकाः नं गुम्हगुम्हेसिनं धयावयाच्वंगु दु ।

थुगु मण्डलय् च्याहःपलेया दुने च्यागू मङ्गलया चिं (अष्टमङ्गल) नं दुथ्यानाच्वंगु दु । गुगु पोतासं च्वयेबलय् च्वयेम्वाः । उगु मङ्गल चिंया च्याम्ह बोधिसत्त्वपिनिगु प्रतिक नं खः । गुगु क्वय् न्त्यब्वयाच्वना ।

अष्टमङ्गलया नां

१. श्रीवत्स (वच्छ)
२. पुण्डरिक
३. ध्वज
४. कलश
५. चामर
६. मत्स्ययुगम
७. छत्र क्षितिगर्भ
८. शंख

अष्ट बोधिसत्त्वपिनिगु नां

- मैत्रीय बोधिसत्त्व
- गगनगंज बोधिसत्त्व
- समन्तभद्र बोधिसत्त्व
- वज्रपाणी बोधिसत्त्व
- मञ्जुघोष बोधिसत्त्व
- सर्वनिवर्ण विस्कम्भी बोधिसत्त्व
- सर्वनिवर्ण विस्कम्भी बोधिसत्त्व
- खगर्भ बोधिसत्त्व

भीसं थःथःपिनिगु धलं दनेबलय् बुद्ध मण्डल, धर्म मण्डल, संघ मण्डलया नं धलं दनेमाःगु परम्परा दु । उगु संघ मण्डलय् च्वय् न्त्यथनापिं बोधिसत्त्वपिसं चाःहिइकाः अवलोकितेश्वर (करुणामय) विराजमान जुयाच्वंगु दु । थुकथं हे ज्वःलाःगु थुगु म्हपुजाया मण्डलय् बोधिसत्त्वपिं स्वरूपगु अष्टमङ्गलया चिं नं चाःहिइका थःगु चित्त अर्थात् चेतना स्वरूपगु चिकं मन्दः (गुम्हगुम्हेसिनं थःगु आत्म स्वरूप नं धायेगु याः) थानाः काय मण्डलया स्थापना याइ । थुगु काय मण्डल वा संघ मण्डलया करुणामय नं थः हे भाःपिइगु खः । गुगु भीगु म्हपुजा धयागु खँबलं हे प्रष्ट यानाच्वंगु दु ।

संघ धायेबल्य् समूह, पुचः वा छगू परिवार धकाः भीसं थू । गथे कि भिक्षु संघ धायेबल्य् भिक्षुगणपिनिगु समूहयात धाइ । वज्राचार्य संघ धायेबल्य् वज्राचार्यपिं जक समुच्चय जुयाः मुनाः दयाच्चंगु पुचःयात कायेफु । थुकथं बिचाः यायेबल्य् भीगु म्ह (शरीर) नं थी थी अंग प्रत्यंगया समुच्चय जुयाः दयाच्चंगु खः, गथे कि - ल्हाः, तुति, जँ, प्वाः, छाति, छचं, मिखा, न्हाय्, न्हाय्पं व म्हुतु आदिया समुच्चय स्वरूप हे म्ह (शरीर) खः । थथे तुं ला, हि, क्वयै, स्यै, स्वै, न्त्यपु, आन्द्रा आदिया समुच्चय जुयाः दयाच्चंगु जीव खः । जीव व शरीरया समुच्चय जुयाः हे मानव मनू थौं चेतनशील प्राणी जूवंगु खः । थुकथं मनू नं छम्ह संघ खः धायेमाः । अथे तुं परिवार मां, बौ, दाजु, किजा, तता, केहें, काय, म्ह्याय् आदि दयाः समूह पुचः जुयाच्चनी व नं छगू संघ खः । अथे जुयानित्तिं भी सकल परिवारपिं च्वनाः मन्दः च्वयाः धलं दनाः म्हपुजा यायेगु खः । उकें संघ मण्डल अर्थात् थः हे स्वरूपगु मन्दः जुयानित्तिं हे काय मण्डल धाःगु खः ।

थुकथं थःथम्हं बोधिसत्त्व चर्या दच्छियंकं धारणा यानाः च्वनेफयेमाः, अष्टमङ्गलया प्रभावं न्त्याबलें मङ्गल जुयाः, म्वाः थें दृढ जुयाः, माय् थें पूर्ण जुयाः, वा थें शुद्ध जुयाः, आखें थें पवित्र जुयाः, चिकं मन्दः थें शुक्ष्म गम्भीर जुयाः, बोधिसत्त्वपिं थें दयावान, करुणावन्त जुयाः शान्ति साधना स्वरूप हे म्हपुजाया लक्ष्य खः । विशेषता खः ।

अथेतुं सि (फलफूल) दुने नं स्यांगुलि थें चंचं धायेगु, खोसिं थें घिसिमिसि धायेगु, तःसि थें पवित्र जुइगु, ग्वय्स्वां सुकू मगं थें भीगु शरीर शिथिलता मजुइगु । खेलुइताः दिनदिन च्याकाः च्याःगु इताल्य् मिखा पियाः दृष्टि साधन यानाः थःगु म्हया कान्ति (तेज) सदां पिब्वयाच्चनेगु । हानं पञ्चज्ञान (न्यातु हनातःगु कोखा), पञ्चतत्त्व (कोखाय्च्वंगु नायः) स्वरूपगु कोखा जजंका क्वखायाः शरीर्य् दयाच्चंगु तेजयात सदां दृढ व स्थीर यायेगु आदि सकतां खँ भीगु म्हपुजाया दुने दयाच्चंगु दु ।

थुजाःगुकथं भावनाय् दुनाः द्वलंद्वः न्ह्यःनिसैं म्हपुजा यानाः चतुरब्रह्म
विहारया भावनायात पालना यानाः दया, माया, करुणा, ममतां भय्भय् बिकाः
हनावयाच्वंगु नखः खः ।

थुगु नखः नेपाल संवत्या नापनापं वःगु धकाः धायेमछिं । छाय् कि
नेपाल संवत्या स्थापना १११७ दैं तिनि दत । म्हपुजाया परम्परा उया नं गुलिखय्
न्ह्यवःनिसैं दयाच्वनेधुंकल धयागु न्यनेदु । इतिहास शिरोमणि बाबुराम
आचार्यजुं म्हपुजाया परम्परा भिन्त्यासःदैं स्वयाः नं न्ह्यवःनिसैं दयेधुंकूगु दु
धकाः न्ह्यथनातःगु दु । अभ् थुयासिबें नं न्ह्यवनिसें हे दयेधुंकूगु जुइफु ।

आःतक लुयावःगु विविध लिच्छविकाल ल्वहँपौ नं बछलाथ्व पारुयात
विशेष महत्त्व बियावयाच्वंगु दु । उकिं नेपाल संवत् स्वयाः नं न्ह्यःयागु
लिच्छवी ल्वहँपौलय् खनेदयाच्वंगु संवत् नं थ्वहे म्हपुजाया पारुकुन्हु हिलीगु
खः । थुगु लिच्छविकालया अभिलेखं प्रष्ट यानाच्वंगु दु ।

न्हापायापिं शासकपिसं संवत् हिलीगु बखतय् कार्तिक शुक्ल प्रतिपदा
(कछलाथ्व पारु) म्हपुजाकुन्हु हे लाकाः हिलीगु परम्परा दयाच्वंगु दु । नेपाल
संवत् धकाः उगु हे न्हि (दिन) लाकाः स्वनावन । गुगु आःतक नं भीसं
छ्चलावयाच्वनागु हे दनि ।

नेपाल संवत् स्थापना जुसानिसैं मल्लकालया दकलय् लिपाया जुजु
जगतप्रकाश मल्लया पालय् तक्कं अविरल रूपं न्ह्यानावयाच्वंगु संवत् खः ।
गबलय् गोरखाया पृथ्वीनारायण शाह द्वाहांवल अबलेसंनिसैं नेपाःया
परम्परायात म्वय्थ्यानाः नेपाल संवत्या थासय् शक संवत्यात छ्चलाबुलाय्
हल । उगु हे क्रमं राणा कालया चन्द्रशमशेरया पालय् तक्कं न्ह्यात । उम्ह
चन्द्रशमशेरं शक संवत्यात हते यानाः भारतं बांछ्वयातःगु विक्रम संवत्यात
छ्चलाबुलाय् हल, गुगु आःतक नं भीसं करंवरं छ्चलावयाच्वनागु दु ।

कैर्तिक शुक्ल प्रतिपदा म्हपुजा व नेपाल संवत् विशेषतां जाःगु
कछलाथ्व पारु अति विशिष्टगु न्हि धायेमाः । नेपाःगाःया प्राचीन शासकपिसं

थुगु न्हिकुन्हु लाकाः संवत् हिलेगु परम्परा चले यानातःगु गाक्कं अर्थपूर्ण जू वः । गुगु कछलाथ्व पारु कतिं पुन्ही व सकिमना पुन्हीया दुने लाः वः । थुगु कतिं पुन्हीनिसें सकिमना पुन्हीतक्कयात कार्तिक महोत्सव (कौमुदी महोत्सव) आदि धकाः जातकमालाय् धयातःगु दु । भीगु परम्पराय् कतिं पुन्हीकुन्हु स्वयम्भू महाचैत्यया प्रादुर्भाव जूगु न्हि खः । अथे हे सकिमना पुन्हीकुन्हु स्वयम्भू महाचैत्यया प्रतिस्था कर्म जूगु न्हि खः । थ्वहे निगू न्हिया लुमन्तियात कयाः स्वयम्भूया मेला जुइ । थुकिइ येंयापिसं ब्वति मकाःसां तबि नं यलयापिसं ब्वति कयाः स्वयम्भू व मञ्जुश्रीयाथाय् नामसंगीति तुतः आदि ब्वनाः न्हिथं स्वयम्भू महाचैत्य व मञ्जुश्री स्मृतिचैत्यया परिक्रमा यानावयाच्चंगु दु । थुकथं निगू पुन्हीया दत्थुइ लाःगु कछलाथ्व पारु गाक्कं महत्त्वपूर्ण जुयाः अतिकं उपयोगी सिद्ध जुयाच्चंगु दु । नेपाल संवत् व म्हपुजायात थःगु हे थासय् तयाः थुगु पारुया दुने दुनेथ्यंक दुवाले माःगु अति आवश्यक जू वः । सुभाय् ॥

मिजला लय्पौ, दँ १ ल्याः २ स पिदंगु ।



पुजा-क्रियाय् मन्दःया छयला

— बि.एस. रत्न

भीगु आध्यात्मिक बौद्ध समाजय् सांस्कृतिक पुजा-क्रियाय् दुने आपालं देवदेवीपिं सुलाकासा म्हिताच्चंगु दु । उकें भीसँ खनेमदु थाय् तय्जु यायेयः धइ थें आराधना उपासना आदि यानावयाच्चना । चायागु, ल्वहँयागु, धातुयागु मूर्ति जक मखु कापतय् च्वयातःगु पौभाः, मण्डल चित्र आदि न्ह्यःने तयाः नं पुजा अर्चना आदि यानावयाच्चना । थ्व भीगु संस्कृतिया देन मखु धकाः गथे धाये ।

नेपाःगालय् थी थी देवदेवीपिनिगु मण्डल च्वयेगु, च्वकेगु प्रचलन गुरु परम्पराकथं न्ह्यानाच्चंगु व थौतक नं थुगु परम्परा ल्यनाच्चंगु दनि । विशेषत मण्डल च्वयेगु परम्परा तन्त्र सम्प्रदायया आधारकथं खनेदु । उगु हे तन्त्रया आधारकथं हे पुजाक्रिया कर्मकाण्ड नं न्ह्यानाच्चंगु दु । उकिं हे महायानी वज्रयानी पुजाक्रियाय् मण्डलया तःधंगु विशेषता दु । मण्डल विना छुं नं पुजाक्रिया जूगु खनेमदु । साधारण तथा न्ह्यागु पुजाक्रियाय् नं गुरु मण्डल पुजा जुइ । गुरु मण्डल पुजा जुइ धुन कि तिनि गुगु पुजा खः उगु हे विधि अनुसार पुजा जुइ ।

पंचोपचार पुजा व पंचोपहार पुजाय् जक मण्डलया आवश्यकता मदु । मेगु न्ह्यागु पुजाक्रियाय् नं मण्डलया अनिवार्यता दु । चाहे गुह्य जुइमा

चाहे बाह्ये जुइमा थी थी मण्डलया नापनापं गुरुमण्डल मज्जिमगानाच्वंगु दु । धात्थें गुरु मण्डल मन्त धाःसा पुजाक्रियाय् ल्हाःध्यना थें जुइ धाःसां छुं पाइमखु । गुरुमण्डल सहित यायेमाःगु पुजा गथे कि- मामकिं पुजा, कलश पुजा, चिभाः बुसाधं सहश्राहुति होम, चापुजा (थुगु पुजा बहनी जक जुइ) छाहायेके पुजा, पताःछा व थाय्पा लुयेगु आदि खः । थथे हे गुरु मण्डलया नापनापं मेमेगु मण्डल स्थापना यानाः जुइगु पुजा खः । अष्टमी ब्रतया धलनय् अमोघपास मण्डलया स्थापनाया नापनापं बुद्ध मण्डल, धर्म मण्डल व संघ मण्डल आदि मज्जिमगानाच्वंगु दु । वसुन्धरा मण्डलया नापं बुद्ध धर्म संघया मण्डल, धर्मधातु बागिश्वरया मण्डल नापं बुद्ध धर्म संघया मण्डल, आर्यताराया ब्रतय् आर्यताराया मण्डलया नापनापं बुद्ध धर्म संघया मण्डल, पंच रक्षाव्रतम् प्रतिसराया मण्डल, चहेब्रतय् भद्रकाली देवीया मण्डलया नापं मञ्जुश्री, गणेश, महाकाल आदिपिनिगु मण्डलया नं आवश्यकता दु ।

थथे हे देवदेवीपिनिगु प्रतिस्था क्रियाय् नं दुस्वः मण्डल (बुद्ध मण्डल) मदयेकं मगाः । अझ नं बुढाबुढी जंको (भिमरथारोहण, महारथारोहण व देवरथारोहण) यायेबलय् नं बुद्ध मण्डलया नापं ग्रह मण्डल, वसुन्धरा मण्डल, उष्णीष विजयया मण्डलं थाय् कयावयाच्वंगु दु । थुगु मण्डल न्हापा न्हापा रज मण्डल अर्थात् धूया रंग क्वल्लाय् वा क्वतलय् च्वइगु खः । तर थौकन्हय् धू रंगं मच्चसे उगु मण्डलया मू देवता जक तयाः कापतय् च्वयाः पौभाःया रूपय् थःगु जंकोया लुमन्तिकथं च्वयेगु प्रचलन नं मदुगु मखु । थुगु जंको क्रियायात “उष्णीष विजयाष्टव” धकाः नं धयावयाच्वंगु दु ।

थथे हे गुगुं नेवाःतय्गु मृत्यु संस्कारय् नं मण्डल च्वयेगु याः । थुगु मण्डल खः दुर्गतिपरीशोधन मण्डल थुगु मण्डल मृत्यु जूम्ह दुर्गतिमोचन जुयाः सुखावति, अकनिस्था भूवन आदिस बास लायेमा धइगु कामनाकथं अथवा मोक्ष प्राप्त जुइमा धइगु प्रणिधानया रूपय् च्वइगु खः थुगु मण्डल आःतक नं धूया रंगं क्वल्लाय् च्वयावयाच्वंगु दु । थथे हे म्हाय् मस्त बाढाः तयाः बाढाः ब्यंकेबलय् नं थाय्भुइ सूर्य मण्डल च्वयेमाःगु परम्परा दु । थुकथं न्ह्यानाच्वंगु

परम्पराय् थुगु दुर्गतिपरिशोधन मण्डल व बाहाः ब्यंकेबलय्या सूर्य मण्डल विशेष यानाः वज्राचार्य, शाक्य, तुलाधरपिनिगु संस्कृतिइ जक न्ह्यानावयाच्वंगु परम्परा खः ।

थथे हे तुं रहस्यात्मक गुह्य परम्पराया पुजा क्रियाय् नं थी थी तन्त्रया वचन अनुसार मण्डल च्वइ । गथे कि चक्रसम्बर मण्डल वज्रवाराही मण्डल, हे वज्र मण्डल, नैरात्मा मण्डल, योगाम्बर मण्डल, चन्द्रमहारोषण मण्डल, कालचक्र मण्डल आदि खः । गुम्ह गुम्ह छःया पुजा-क्रिया जुइगु खः उम्ह उम्ह छःया मण्डल च्वयाः पुजा आज्ञा जुइ । थुगु पुजाया विधि विधान व थी थी तन्त्र अनुसारया पुजा विधिं स्पष्ट याः ।

भीसं मण्डल तःगुक्थंया खनावयाच्वनागु दु । गुगु चतुष्कोण दयाः प्यंगू लुखा हितिमंगः किनीकिनीजाल पंचसूत्र प्यंगू त्वरण आदि अंकित जुयाच्वंगु दु । थ्व इवात्त स्वयेबलय् विश्व वज्र (द्यतनाच्वंगु वज्र) या आकारय् खने दयाच्वंगु दु । थुक्थिया नं दुने मू छःया अनुसारं भी खुह पले, च्याह पले आदि रूपं तँ तँ तयाः च्वयातइगु खः । थुक्थिया पिने चाकलाक्क तयाः पद्मावली (पलेस्वामा) वज्रावली (वज्रया माः) गुगुलिइ च्यागू मसान (अष्ट सम्सान) अनलि ज्वालावली (मिजला) चाहिकाः तयातइगु खः । थथेतुं धर्मधातु मण्डल कालचक्र मण्डलं आदि भीखुगू भीनिगू लुखा दयाच्वनी । अथे हे तुं पःखाःमो, किनीकिनीजाल पंचसूत्रतु आदि उगु हे रूप दयाच्वनी । थथे तुं यानाः त्रिकोण आदि नं दयाच्वंगु दुसा गुगुलिं चर्तुकोण लुखा त्वरण आदि मतः । पद्मावली, वज्रावली, ज्वालावली आदि दयाः षट्कोण, त्रिकोण दयाच्वंगु मण्डल नं भीसं खनावयाच्वनागु हे दु ।

थथे तुं भी धलं दनेबलय् स्थापना याइगु बुद्ध धर्म संघया मण्डलया संक्षिप्त रूपया मण्डल धाःसां छुं मपाः । उगु मण्डलय् मूल देवया दत्थुइ तयाः च्यागू पलय्, च्याम्ह देवतापिं खनेदयाच्वंगु दु । गथे कि बुद्ध मण्डल धायेबलय् दत्थुइ अक्षयोम्भ बुद्ध तयाः अनपिने च्याहःपलय् प्यम्ह तारापिं

तयातःगु खनेदु । धर्ममण्डल प्रज्ञापारमिता व बोधिसत्त्वपिं अथे हे संघ मण्डलय् षडक्षेरी लोकेश्वर व मैत्री आदि च्याम्ह बोधिसत्त्वपिं स्थापना यानातःगु दइ । थुकिइ ज्वालावली, पद्मावली, लुखा, किनीकिनीजाल, पःखाःभो आदि छुं नं तयाचवनेम्वाःगु खनेदु । उकें हे ध्वयात “संक्षिप्त मण्डल” धाःगु खः ।

गुर्जुपिसं प्रत्येक पुजा-क्रिया यानावयाच्वंगु मण्डल गुरु वज्रसत्त्वया मण्डल खः । थुगु मण्डलया स्वरूपय् दत्थुइ गुरु वज्रसत्त्वयात विराजमान यानाः अनं पिने त्रिकोणात्मक दयाः गोलाकार जुयाः अनंपिने च्याहःपले, द्विप, उपद्विप च्वनी । अनं पिने नं च्याहःपले दयाः उकिइ च्यागू रत्नया स्थापना याइ । थनं पिने च्वय् लाक्क चन्द्र सूर्यया प्रतिक जवं खवं निचाः च्वनी । थुकिइ कुलरूप नीनिगू चिं खनेदु । तर गुर्जुपिसं पोतासं गुरुमण्डल च्वयेबलय् ध्व फुक्कं क्यने फइगु सम्भव मजू धायेमाः उकें चाः छचाः जक च्वयावयाच्वंगु दुसा पुजा यायेबलय् थुगु हे अनुरूपं स्वां ब्वयावयाच्वंगु दु । ध्व गुरुमण्डल सफुतिं याउँक क्यं ।

थुकथं न्ह्यानाच्वंगु मण्डल यक्व दु अले अजाःगु मण्डल च्वयेबलय् गन छु छु तयेमाः देवदेवीपिनिगु ध्यान वर्ण ज्वसां आदि वर्णन नं उगु उगु हे पुजाक्रियाया सफुतिइ दयाच्वंगु दु । अथेतुं निष्पन्नयोगावली, वज्रावली, साधन माला आदि ग्रन्थपाखें नं भीत कनाच्वंगु दु ।

गुगुं मण्डलय् अष्ट सम्मान नं तयातःगु दु । उगु अष्ट सम्मान अप्वः यानाः गुह्यः परम्पराया मण्डलय् जक खनेदु । थुकथं अष्ट सम्मानया वर्णन निष्पन्नयोगावली नीखुगू मण्डलया इबलय् गनं नं मदुसां तवि नं तन्त्रमन्त्रय् अष्ट सम्मानया अनिवार्यता क्यनातःगु दु । अष्ट सम्मानया दुने अष्ट मातृका, अष्ट भैरव, अष्ट सिद्धा चैत्य, नाग, वृक्ष, जन्तु, पंक्षी आदि छचलावयाच्वंगु दु । गुगुलिइ मातृका, भैरवया थासय् अष्ट दिगपाल नं छचलेगु परम्परा दु । स्वयम्भू पुराणया आधारकथं स्वयेबलय् मातृका दिगपाल नं तयेमाः धइगु खनेदु ?

थी थी देवदेवीपिनिगु ध्यानवर्ण आदि पुजा-क्रियाया दुने जिवीत रूप दयाच्चंगु थुगु परम्पराय् शास्त्रीय मण्डल कलायात धर्मज्ञ, दार्शनिक कला चिन्तकपिसं धर्मया थी थी शब्दयात भावनात्मक पक्षं न्ह्यब्वयाः अमूर्तगु शब्द पौभाः कलाया दुने अथवा मण्डल कलाया दुने मूर्त रूपं न्ह्यब्वयाः बिल धाः सां छुं मपाः । थुगु पक्षय् विस्तृत रूपं दुवाला वन धाः सा प्रष्ट जुयेफइगुलिइ शंका मदु । अस्तु ॥

पुल्चोक क्याम्पसं पिहांवः गु मन्दः दै पौ, दै १० ल्या न स पिदंगु ।

